

## Faaaliga

---

Aso: 25 Oketopa, 2016

○ LE EKALEZIA A  
**IESU KERISO**  
○ LE AU PAIA O ASO  
E GATA AI

Mo: Au Pulega Aoao; Fitugafulu Eria; Peresitene o Siteki, Misiona, ma Itu; Epikopo ma Peresitene o Paranesi; Sui o Aufono a Siteki ma Uarota

Mai le: Aufono Faapitoa a le Au Perisitua ma le Aiga (801-240-2134)

Mataupu: Auaunaga i Tagata e Tosina Atu i le Itupa e Tasi

---

O punaoa ua faafouina nei e faatatau i le tosina atu i le itupa e tasi ua maua nei mo tagata taitoatasi, aiga, ma aufono a uarota.

- Faitotoa o le “Tosina Atu i le Itupa e Tasi” i le Autu o le Talalelei i le LDS.org (tagai i mea ua faapipii atu)
- Aoaoga a le Ekalesia (tagai i mea ua faapipii atu)
- O Fesili e Fesiligia Soo (tagai i mea ua faapipii atu)
- Uepisaite o le Mormonandgay.lds.org ua maua i le Igilisi
- Punaoa mo Auaunaga (ministering.lds.org), ua maua nei i gagana e 10 mo sui o aufono a uarota ma siteki e ala i le Punaoa mo Taitai ma Failautusi i le LDS.org.

O nei punaoa e mafai ona iloiloaina i se fonotaga a se aufono a se siteki po o se uarota.

# Tosina Atu i le Itupa e Tasi

25 Oketopa, 2016

O LE EKALEZIA A  
IESU KERISO  
O LE AU PAIA O ASO  
E GATA AI

---

*Mai Autu o le Talalelei i le topics.lds.org:*

O le tosina atu i le itupa e tasi e faatatau lea i le tosinaga faalelagona, faaletino, pe faalefeusuaiga i se tagata o le itupa lava e tasi. O lagona o le tosina atu i le itupa e tasi e le tutusa mo tagata uma. O nisi tagata e mafai ona matua tosina atu lava i le itupa e tasi, a o isi e mafai ona lagona le tosina atu i itupa uma e lua.

Ua tuueseese e le Ekalesia le tosina atu i le itupa e tasi ma amioga faatauatane ma faatauafafine. O tagata e lagona le tosina atu i le itupa e tasi pe ua faailogaina o se tane e tosina atu i se tane (gay), po o se tamaitai e tosina atu i se tamaitai (lesbian), pe tosina atu i itupa uma e lua (bisexual) e mafai ona osia ma tausia feagaiga ma le Atua ma auai atoatoa ma le agavaa i le Ekalesia. O le faailogaina o se tane e tosina atu i se tane (gay), tamaitai e tosina atu i se tamaitai (lesbian), pe tosina atu i itupa uma e lua (bisexual) pe lagonaina le tosina atu i le itupa e tasi e le o se agasala ma e le faasaina se tasi mai le auai i le Ekalesia, umiaina o ni valaauga, pe auai i le malumalu.

O le feusuaiga mama o se vaega taua o le fuafuaga a le Atua mo lo tatou fiafia. O faiga feusuaiga ua faapolopolo mo se alii ma se tamaitai ua faaipoipoina ma ua folafola atu e le tasi i le isi le faamaoni atoatoa. O faiga feusuaiga i le va o se alii ma se tamaitai e le i faaipoipo, pe i le va o ni tagata o le itupa e tasi, ua solia ai se tasi o tulafono aupito sili ona taua a lo tatou Tama i le Lagi ma faalavelave ai i lo tatou ala o le alualu i luma e faavavau. O tagata o soo se sootaga faalefeusuaiga e solia le tulafono o le ola mama e mafai ona faaleleia ma le Atua e ala i le salamo. I le avea ai ma soo o Keriso, tatou te tetee atu i amioga le mama ma tauivi ia avea e pei o Ia. Tatou te saili atu i le taitaiga a le Agaga Paia ma le fesoasoani a le Faaola, o le e silafiaina le auala e fesoasoani mai ai ia i tatou pe a faaosoosoina i tatou (tagai 1 Korinito 10:13; MF&F 62:1). Afai tatou te lolo atu i faaosoosoga faalefeusuaiga ma soli le tulafono o le ola mama, e mafai ona tatou salamo, faamagaloina, ma auai ma le atoatoa i le Ekalesia.

Atonu tatou te le iloaina tonu pe aisea e lagona ai e nisi tagata le tosina atu i isi o le itupa e tasi, ae mo nisi o se mea moni e faigata tele ma o se vaega o le aafiaga faaletagata soifua. Ua i ai i le Faaola o Iesu Keriso se malamalamaaga atoatoa o luitau uma tatou te oo i ai iinei i le lalolagi, ma e mafai ona tatou liliu atu ia te Ia mo se faamafanafanaga, olioli, faamoemoe, ma le taitaiga (tagai Alema 7:11–12). Po o a lava luitau atonu tatou te fetai ai i le olaga, o tatou uma o fanau a le Atua, e moomia le agalelei ma le agaalofa o le tasi ma le isi (Roma 8:16–17). A tatou atiaeina se siosiomaga lagolagosua, tatou te fausiaina le alofa mama ma le femalamalamaai mo le tasi ma le isi ma manuia ai mai o tatou manatu ma faatuatua autasi.

# Aoaoga a le Ekalesia

25 Oketopa, 2016

O LE EKALEZIA A  
IESU KERISO  
O LE AU PAIA O ASO  
E GATA AI

---

*Mai le mormonandgay.lds.org.*

## **E Alofa le Atua i Ana Fanau Uma**

E leai se isi mea e sili atu ona faaalua atoatoa ai le loloto ma le lautele o le alofa o le Atua nai lo Lona finagalo ia ositaulagaina Lona Alo ina ia mafai ai e i tatou, o Ana fanau, ona faatoilaloina le oti ma ofo mai ai le ola e faavavau. “Aua na faapea lava ona alofa mai o le Atua i le lalolagi, na Ia aumai ai Lona Atalii e toatasi, ina ia le fano se tasi e faatuatua ia te Ia, a ia maua e ia le ola e faavavau” (Ioane 3:16). E leai se isi mea e sili atu ona faailoa ai le alofa o Iesu Keriso nai lo Lona finagalo ia foai mai Lona soifua e togiola mo agasala a tagata, ia totogi mo mafatiaga ma amioletonu uma, ma motusia ai noataga o le oti mo tagata uma (tagai Alema 7:11–13). “E le sili lava le alofa o se tasi i lenei alofa, ia tuuina atu e se tasi lona ola e sui ai ana uo” (Ioane 15:13).

Mai se savali o le konafesi aoao ia Oketopa 2009, na faamatala ai e Peresitene Dieter F. Uchtdorf le alofa o le Atua:

“E le vaai le Atua i le tino. Ou te talitonu e matua le popole lava o Ia pe tatou te nonofo i se fale tioata po o se faleoo, pe tatou te aulelei pe le aulelei, pe tatou te lauiloa pe le amanaiaina. E ui ina tatou le atoatoa, ae atoatoa le alofa o le Atua ia i tatou. E ui ina i ai o tatou faaletonu, ae e tonu a’ia’i le alofa o le Atua ia i tatou. E ui atonu tatou te lagona ua tatou se ma leai se faasinoala, ae siomia atoa lava i tatou i le alofa o le Atua.

“E alofa o Ia ia te i tatou aua ua tumu o Ia i se fuataga e le uma o le alofa paia, mama, ma le le mafaamatalaina. E taua i tatou i le Atua, e le ona o talaaga o o tatou tomai ae ona o tatou o Ana fanau. E alofa o Ia ia i tatou uma taitoatasi” (“O Le Alofa o le Atua,” Oke. 2009 konafesi aoao).

E alofa le Atua ia i tatou uma. E alofa o Ia ia i latou o faatuatua eseese ma i latou e aunoa ma se faatuatua. E alofa o Ia ia i latou ua mafatia. E tutusa Lona alofa i e mauoa ma e matitiva. E alofa o Ia i tagata o ituaiga uma ma aganuu, o e ua faaipoipo po o e nofotoatasi, ma i latou ua lagona le tosina atu i le itupa e tasi pe ua faailogaina o se tane e tosina atu i se tane (gay), po o se tamaitai e tosina atu i se tamaitai (lesbian), pe e tosina atu i itupa uma e lua (bisexual). Ma ua faamoemoeina i tatou e le Atua ia mulimuli i Lana faataitaiga.

## **Ua Poloaiina i Tatou ia Alofa atu i le Atua ma le Tasi ma le Isi.**

“E te alofa atu i le Alii lou Atua ma lou loto atoa, ma lou agaga atoa, ma lou manatu atoa. O le poloaiga muamua lena ma le sili. E faapena foi lona lua, E te alofa atu i le lua te tuaoi, ia pei o oe lava ia te oe” (Mataio 22:37–39).

“O la’u poloaiga lenei, ia outou fealofani, pei ona ou alofa atu ia te outou” (Ioane 15:12).

Tatou te faaalua lo tatou alolofa mo le Atua e ala i le tausia o Ana poloaiga (tagai Ioane 14:15) ma e ala i le alofa atu i le tasi ma le isi (tagai Ioane 13:34). Afai e i ai se tagata o lou aiga po o se uo ua lagona le tosina atu i le itupa e tasi pe ua faailogaina o se tane e tosina atu i se tane (gay), alolofa i ai. Sa matauina e Peresitene Henry B. Eyring e faapea:

“Afai e te fia faalatalata pea i se tasi e pele ia te oe, ae o loo mamao ese mai ia te oe, e te iloa lava le ala e fai ai. O le a e sailia se ala e te talanoa atu ai ia te i latou, o le a e faalogo atu ia te i latou, ma o le a e iloa foi ni ala e faia ai ni mea mo i latou taitoatasi. O le faateleina o le tupu soo o lena mea, o le umi atu foi lena e faaauau ai, o le loloto atili foi lena o le sootaga o le alofa [i le va ma i latou]. Afai e tele se taimi e alu e aunoa ma se toe talanoa atu i ai, faalogo atu i ai, ma faia se mea mo i latou, o le a faavaivaia lea sootaga. E atoatoa ma mamana le Atua, a o oe ma au o ni tagata faaletino. Ae o ia o lo tatou Tama, e alofa o ia ia i tatou, ma ua ia ofoina mai lea lava avanoa e tasi e faalatalata atu ai ia te ia e pei ona faia i se uo pele. Ma o le a e faia foi i lea lava ala e tasi: talanoa, faalogo, ma faia” (“Ia Faalatalata Atili i le Atua,” konafesi aoao Ape. 1991).

E te faaalua lou alofa mo le Atua e ala i le alofa atu ma le auauna atu i isi. “Ma faauta foi, ua ou ta’u atu nei mea ia te outou ina ia mafai ona outou aoaoina le poto; ina ia mafai ona outou aoaoina, pe a outou auauna atu i o outou uso-a-tagata, ua nao lo outou auauna atu lava lea i lo outou Atua” (Mosaea 2:17).

O le a le uiga o le alofa i le tasi ma le isi? O le alofa e popole. O le alofa e faalogo. O le alofa e faaafia mai. O le alofa e musuiaina. O le alofa o loo i ai i le fatu o mea o loo fausia ai tatou o ni tagata soifua, aua o i tatou o fanau a le Atua, ma o le “Atua o le alofa lava ia” (1 Ioane 4:8). I le tausamaaga mulimuli, sa aoao mai ai le Faaola, “O le mea lea e iloa ai e tagata uma lava o o’u soo outou, pe afai ua outou fealofani” (Ioane 13:35).

O le poloaiga ia alofa le tasi i le isi [po o le fealofani] ua aafia ai ma i latou e le o vaai atu i le lalolagi i le ala lava e tasi o loo tatou vaaia ai. Na faamalamalama mai e Elder Dallin H. Oaks:

“I le tele o mafutaga ma tulaga i le olaga, e tatau lava ona tatou ola faatasi ma nei eseese. I tulaga e taua ai, o lo tatou itu o nei eseese e le tatau ona teenaina pe lafoaia, ae i le avea ai ma soo o Keriso e tatau ona tatou ola filemu faatasi ma isi e le tutusa o tatou tulaga faatauaina pe talia ia aoaoga ia o loo faavaeina ai. O le ata o le faaolataga a le Tama, lea ua tatou iloa i faaaliga faaperofeta, ua tuu ai i tatou i se tulaga faaletino lea e ao ai ona tatou tausia Ana poloaiga. E aafia ai i lena mea le alofa i o tatou tuaoi e eseese aganuu ma talitonuga e pei ona Ia alofa mai ia i tatou. E pei ona aoao mai se perofeta o le Tusi a Mamona, e tatau ona tatou fetaomi atu i luma, ma ‘se alofa i le Atua ma tagata uma’ (2 Nifae 31:20)” (“Ola Faatasi ma Alolofa atu i Isi e Eseese o Tatou Talitonuga,” konafesi aoao Oke. 2014).

O le alofa faalelagi na te le faatagaina le agasala—“O A’u o le Alii e le mafai ona Ou vaai i luga o le agasala ma sina tikeri itiiti o le faatagaina”—ae naunau e faamagalalo—“e ui i lea, o ia o le e salamo ma faia poloaiga a le Alii o le a faamagaloina” (MF&F 1:31–32). I lea lava tulaga e tasi, e le tatau ai ona tatou fetuutuunaia le auala tatou te ola ai ma le puipuia o poloaiga a le Atua, ae ia faataitai atoatoa le alofa o le Atua, e tatau foi ona tatou alolofa i le tasi ma le isi ma le lotomatala ma le atoatoa ina ia le lagona ai e se tasi le tuulafoaiina pe tuuatoatasi pe leai se faamoemoe.

## **Ua I Ai i le Faaola se Malamalamaaga Atoatoa e uiga i o Tatou Faigata Uma**

“Aua o ona po nei tatou te vaavaai ai faanenefu i le faaata, a o ia ona po tatou te fesagai ai; o nei ona po ou te iloa ai faaleatoa, a o ia ona po ou te iloa tino ai, pei ona iloatinoina o a’u” (1 Korinito 13:12).

I le avea ai ma tagata faaletino, ua tapulaa ai lo tatou malamalama. E mafai ona tatou tautino faatasi atu ma Nifae ua tatou “iloa e alofa o ia i ana fanau; e ui i lea, [tatou] te le iloa le uiga o mea uma” (1 Nifae 11:17).

A o tatou sailia ni tali ma le taitaiga mo la tatou malaga faaletagata lava ia, e mafai ona tatou faalagolago i le Atua ma le mana o loo i ai i le taulaga togiola a Iesu Keriso. Ina ua tauaveina e Iesu Keriso i Ona lava luga agasala a le lalolagi, sa Ia lagonaina foi tiga ma mafatiaga uma e mafai ona oo i ai soo se tagata soifua.

“Ma o le a afio atu o ia, ma mafatia i tiga ma puapuaga ma faaososoga o ituaiga eseese uma; ma o le a oo ia te ia nei mea, ina ia mafai ona faataunuaina o le upu ua fai mai, o le a ia ave i ona luga tiga ma ma’i o ona tagata” (Alema 7:11).

## **O Lagona o le Tosina Atu i le Itupa e Tasi E Le o se Agasala ma e Mafai ona Tatou Filifili le Auala e Tali atu ai**

E le o i ai se tulaga o le Ekalesia e faasaga i le mafuaaga o le tosina atu i le itupa e tasi. I le 2006, sa ta'ua ai e Elder Dallin H. Oaks:

“E le o i ai i le Ekalesia se tulaga e uiga i mafuaaga o soo se aafiaga o nei faatosinaga po o ni lagona e faatino, e aofia ai na aafiaga e faatatau i le tosina atu i le itupa e tasi” (faatalanoaga i le 2006 ma Elder Dallin H. Oaks ma Elder Lance B. Wickman: “Same-Gender Attraction (Tosina Atu i le Itupa e Tasi”).

O lagona o le tosina atu i le itupa e tasi e le o se agasala. Na taua e Elder M. Russell Ballard:

“Ia tatou malamalama: E talitonu Le Ekalesia a Iesu Keriso o le Au Paia o Aso e Gata Ai e faapea “o le aafiaga o le tosina atu i le itupa e tasi o se mea moni e faigata mo le toatele o tagata. O le faatosinaga lava ia e le o se agasala, ae o le faatinoina o se agasala lea. E ui lava e le filifilia e tagata taitoatasi ina ia maua i ia faatosinaga, ae ua latou filifili pe faapefea ona tali atu i na faatosinaga. Faatasi ai ma le alofa ma le malamalama, ua aapa atu ai le Ekalesia i fanau uma a le Atua, e aofia ai [i latou e tosina atu i le itupa e tasi]” (“O Loo Manaomia Oe e le Alii i le Taimi Nei!” Liahona, Sete. 2015, 12).

E ui o le tosina atu i le itupa e tasi e le o se agasala, ae e mafai ona avea ma se luitau. E ui e mafai e se tasi ona le filifili e maua nei lagona, ae e mafai ona ia tuuto atu e tausi ia poloaiga a le Atua. O matua o se tamaitiiti ua lagonaina le tosina atu i le itupa e tasi pe ua faailogaina foi o se tane e tosina atu i se tane (gay) e tatau ona filifili e alolofa ma taliaina lena tamaitiiti. I le avea ai ma se faapotopotoga o tagata o le Ekalesia, e tatau ona tatou filifili e fatua'i se faalapotopotoga faaleuo.

“Ma ua ia valaauina i latou uma ia o mai ia te ia, ma taumamafa i lona agalelei; ma e le teena e ia se tasi e sau ia te ia, . . . ua tutusa uma i le Atua” (2 Nifae 26:33).

## **O Tagata e Ola i Tulafono a le Atua e Mafai ona Auai Atoatoa i le Ekalesia**

“E moni, ua ou iloa e le faailogaina tagata e le Atua” (Galuega 10:34).

Ua folafola mai e le Atua afai tatou te usiusitai i Ana tulafono o le a tatou maua le olioli e faavavau, ma Na te tausia i taimi uma Ana folafolaga. Ua manino lava o tagata e lagonaina le tosina atu i le itupa e tasi pe ua faailogaina o se tane e tosina atu i se tane (gay) e mafai ona osia ma tausia ni folafolaga i le Atua. E mafai ona latou savavali i Lona malamalama. E mafai ona latou auai atoatoa i le Ekalesia.

“Afai e lagona e tagata le tosina atu i le itupa e tasi ae e le o faia ni amioga faatauatane pe faatauafafine, e tatau i taitai ona fesoasoani ma faamalosiua i latou i a latou faaiuga e ola i le tulafono o le ola mama ma pulea lelei ni mafauauga lē amiotonu. E mafai e nei tagata ona maua ni valaauga i le Ekalesia. Afai e agavaa i latou ma ta'uaogaina i soo se itu, e mafai foi ona maua o latou pepa faataga o le malumalu ma maua sauniga o le malumalu” (*Tusitaulima 2: Taitaiina o le Ekalesia*, 21.4.6).

Na taua e Peresitene Gordon B. Hinckley:

“Tatou te alolofa ia i latou o atalii ma afafine o le Atua. Atonu e i ai ni o latou faanaunauga patino e malolosi ma atonu e faigata ona puleaina. O le tele o tagata e i ai o latou faanaunauga i se ituaiga e tasi po o se isi foi mai lea taimi i lea taimi. Afai latou te le faatinoina ia faanaunauga ona mafai lea ona latou agai i luma e pei lava o isi tagata uma o le Ekalesia. Afai latou te solia le tulafono o le ola mama ma tulaga faatonuina o le Ekalesia o le amio mama, ona tatau lea ona faia o latou aoaiga faale-Ekalesia e pei ona faia i isi” (“O A Mea o Tuufesili ai Tagata E Uiga Ia I Tatou?” konafesi aoao, Oke. 1998).

Po o a lava tulaga o se tagata, e mafai lava ona ia saofaga i le galuega a le Alii i le taimi nei ma e mafai ona faamoemoeina o lona faamaoni o le a maua ai faamanuiaga lava e tasi, iinei ma i le olaga a sau, ia ua folafola mai e le Atua i soo se tasi e faamaoni faapena. Sa saunoa Elder D. Todd Christofferson:

“E tofu tagata uma ma meaalofa; e tofu tagata uma ma taleni; e mafai e tagata uma ona saofaga i le tatalaina mai o le fuafuaga paia i tupulaga taitasi. E tele mea e lelei, e tele mea e manaomia—o nisi lava taimi o mea uma e tatau ai mo le taimi nei—e mafai ona ausia i tulaga faatauvaa. Ua toatele naua outou o loo faia le mea silisili tou te mafaia. Ma a outou amoina avega aupito mamafatu o le olaga nei, ia tutulai a’e e puipuia le fuafuaga a le Atua ia faaeaina Lana fanau, ua tatou saunia uma lava e lagolagoina outou. Faatasi ai ma le mautinoa tatou te molimau atu o le Togiola a Iesu Keriso ua faamoemoeina, ma, i le iuga, o le a tauia ai mea uma na le’i mauaina, ma le toilalo o i latou na liliu atu ia te Ia. E leai se tasi na muai fuafuaina faapea e itiiti mea na te maua nai lo mea uma o i le Tama mo Ana fanau” (“Aisea e Faaipoipo Ai, Aisea e Fai ai se Aiga,” konafesi aoao, Ape. 2015).

### **O Le Tulafono o le Ola Mama e Faatatau i Fanau Uma a le Atua.**

O feusuaiga mama o se vaega taua o le fuafuaga a le Atua mo lo tatou fiafia. Na tautino mai e le Au Peresitene Sili ma le Korama a Aposetolo e Toasefululua:

“O le uluai poloaiga na tuuina e le Atua ia Atamu ma Eva, e faatatau i lo la agavaa mo le tulaga faamātua, o se tane ma se ava. Matou te ta’utino atu o le poloaiga a le Atua i Lana fanau ia fanafanau ma uluuluola ai le lalolagi, ua faamalosia ma faatumauina. Matou te toe ta’utino atu foi ua poloai mai le Atua, o mana paia o le foafoaina o fanau, ua na o le va lava o le alii ma le tamaitai ua faaipoipoina faaletulafono, o se tane ma le ava, e tatau ona faaagaina ai” (“O Le Aiga: O Se Folafolaga i le Lalolagi”).

O faiga feusuaiga i le va o se alii ma se tamaitai e le i faaipoipo, pe i le va o ni tagata o le itupa e tasi, o se agasala ma ua solia ai tulafono aupito sili ona taua a lo tatou Tama i le Lagi ma faalavelave ai i le ala o lo tatou alualu i luma e faavavau.

“O le tulafono a le Alii o le ola mama e faasaina ai faiga feusuaiga i fafo o faaipoipoga faatulafonoina ma le faamaoni a’ia’i i totonu o le faaipoipoga. O faiga feusuaiga ua na o le va lava o se alii ma se tamaitai ua faaipoipoina faaletulafono o se tane ma se ava e tatau ai. O le mulilua, faitaaga, faiga faatauatane pe faatauafafine, ma isi faiga uma lē paia, le masani ai, pe le mama o se agasala” (*Tusitaulima 2: Taitaiina o le Ekalesia*, 21.4.5).

O tagata o soo se sootaga faalefeusuaiga e solia le tulafono o le ola mama e mafai ona faaleleia ma le Atua e ala i le salamo.

“Aua e te mulilua; ma o ia o lē e mulilua, ma lē salamo, o le a tuli i fafo. Peitai o ia o lē ua mulilua ma ua salamo ma lona loto atoa, ma lafoai i ai, ma lē toe faia, ia outou faamagaloina” (Mataupu Faavae ma Feagaiga 42:24–25).

---

*Mai le mormonandgay.lds.org.*

## **Aisea ua Faaaoga ai le Faaupuga “Tosina Atu i le Itupa e Tasi”? Aisea e Le Tau ai Na Ona Faaopea “Gay (O se Tane e tosina atu i se Tane)”?**

O le tosina atu i le itupa e tasi e faasino lea i tosinaga faalelagona, faaletino, faamama'i, pe faalefeusuaiga i se tagata o le itupa e tasi. Afai e te lagonaina le tosina atu i le itupa e tasi, e mafai pe le mafai foi ona e filifili e faaoga se faailoga o sootaga faalefeusuaiga e faamatala ai oe lava ia. Po o le a lava le ala, o le tosina atu i le itupa e tasi o se faaupuga talafeagai e faamatala ai le aafiaga e aunoa ma le faaee atu o se faailoga. Ua faaoga e le uepisaite leni faaupuga e faaafia uma ai ma tagata o e e le toafimalie i le faaogaina o se faailoga, e le teenaina ai le i ai o se faasinomaga o se tosina atu o le tane i se tane (gay), tamaitai i le tamaitai (lesbian), po o itupa uma e lua (bisexual).

## **Aisea e Le o Talanoaina ai e le Uepisaite ia Lagona Lofituina o Itupa po o Faafitauli Faaleitupa e Ese mai Lona Tagata Moni?**

O le tele o mataupu faavae lautele o loo faasoaina i luga o leni uepisaite (mo se faataitaiga, o le taua o le faaafia ma le agalelei) e faatatau i le Au Paia o Aso e Gata Ai o e lagonaina le lofituina faaleitupa pe ua faailogaina o se itupa e ese mai lona tagata moni. Peitai, e matua eseese lava le tosina atu i le itupa e tasi ma le lofituina faaleitupa. Mo se faataitaiga, o i latou e lagonaina le lofituina faaleitupa e mafai pe le mafai foi ona lagonaina le tosina atu i le itupa e tasi ma o le toatele o i latou e lagonaina le tosina atu i le itupa e tasi e le mananao e suia lo latou ituaiga itupa. Mai se vaaiga faalemafaufau ma faaleauaunaga, e eseese mea ia e lua.

## **O E Fesili Ifo ea ia te Oe Lava Pe o Oe o se Tane e Tosina i se Tane (Gay)?**

Afai o e fesili ifo ia te oe lava pe o e tosina atu i se tane, masalo o loo e lagonaina le tosina atu i le itupa e tasi ma o loo e tuufesili pe faapefea ona faamatala nei lagona. O manaoga feusuai e lavelave ma e mamauina e le tele o mafuaaga. E ui o se tosinaga faamama'i, faalelagona, pe faalefeusuaiga e mafai ona faailo ai se sootaga faalefeusuaiga, ae e le tatau lava ona otometi ona e manatu o se faailo lea. O manaoga feusuai e mafai ona tafe ma e mafai ona suia. Afai o loo e le mautonu, e le tatau ona e lagonaina le mamafatu pe faananati foi e faia ni faaiuga e uiga i lou tulaga faalefeusuaiga.

O upu e eseese lava uiga i tagata eseese, ma o le faauigaga o se upu e mafai ona suia i le aluga o o tatou olaga. O le a le uiga o le upu *gay* ia te oe? O se lagona ea? se faasinomaga? se sitaili ea o le olaga? O le faaogaina o le upu *gay* (*tosina atu o le tane i se tane*) o loo fesuisui lava a o fesuisui foi malo ma aganuu. O le faailogaina [o se tasi] o se gay (tane i le tane) e mafai ona faauigaina ua e tosina atu i le itupa e tasi ae le filifili e faatino nei lagona. Pe atonu foi o leni faailoga ua faamatala ai le auala o loo e faailoa atu ai oe lava ia faalelagona, faaletino, faalefeusuaiga, pe faaupufai. Afai e te tuufesili po o le a le uiga o le tala a se tagata pe a fai mai, “O a’u e gay,” ia fesili i ai.

## **Pe Tatau Ea Ona Ou Faailoa Atu Au?**

Mo nisi tagata, o le taofia faalilolilo o lagona o le tosina atu i le itupa e tasi e mafai ona tupu ai le maasiasi po o se talanoaga le lelei faalilolilo. O le faasoa atu o na lagona i se uo faatuatua e mafai ona maua ai le toomaga ma se faamalologa. Peitai, o nisi e momoo maimau pe ana faatali umi atu pe faatapulaa foi le toatele o tagata latou te faailoa atu i ai o latou lagona, o lenei la faaiuga e le tatau ona fua i luga o le gauai atu i uunaiga e “faailoa atu” faalauaitele pe ta’u atu faasamasamanoa o ia o se tane e tosina atu i se tane (gay). Afai e te filifili e faailoa atu lagona o le tosina atu i le itupa e tasi, ia mafaufau ma le agaga tatalo po o ai e te fia manao e tau atu i ai ma pe faapefea foi ona e faasoa atu lenei vaega o lou aafiaga faaleolaga nei.

Afai e te filifili e faasoa atu ou aafiaga o le lagonaina o le tosina atu i le itupa e tasi pe faailoa faalauaitele atu foi o oe o se gay, e tatau ona lagolagoina ma taulimaina oe ma le agalelei ma le faaaloalo, i le aiga ma le ekalesia. E manaomia ona tatou onosai uma i le tasi ma le isi a o tatou taumafai e malamalama i nei mea.

I le avea ai ma tagata o le Ekalesia, ua tofui i tatou uma ma se tiutetauave e atiae se siosiomaga lagolagosua ma agaalofo ma o tatou uso ma tuafafine uma. O se faatulagaga lagolagosua faapenei e matua faigofie ai lava ona ola i le talalelei ma saili atu i le Agaga a o feasaa’i ai i soo se vaega o le olaga faaletino.

## **E Mafai Faapefea Ona Ou Talanoa atu i O’u Matua po o le Epikopo e uiga i le Tosina atu i le Itupa e Tasi?**

Afai e te lagonaina le toafimalie e talanoa i se tasi o ou matua, se tasi o le aiga, po o se taitai o le Ekalesia, ia mafaufau e faasoa atu ou lagona ia i latou. Fesoasoani ia latou malamalama i le mea o loo e oo i ai ina ia mafai ona latou faaali atu le alofa ma le lagolago. Afai latou te le malamalama pe faape’i lenei aafiaga, fai atu ia i latou e faitau ia tusiga o loo i luga o lenei uepisaite. Atonu o le a le faigofie le amataina o lenei talanoaga, ae e taua le faia o se talanoaga. Ia onosai i tagata o siomiaina oe, ma manatua o loo outou aoao uma faatasi. Afai e faigata ia i latou e te alofa i ai ona malamalama pe lagolago, atonu la latou te manaomia lau fesoasoani. Taulima ou matua ma taitai i le agalelei lava e tasi ma le faaaloalo o loo e faamoemoe o le a latou faaali atu ia te oe. Ua mamauina lenei uepisaite e fesoasoani ai i tagata uma ia malamalama atili i le tosina atu i le itupa e tasi mai se vaaiaga faaletalalelei.

## **Afai e Lava lo’u Faamaoni, O Le A Aluese ea Ou Tosinaga?**

O le malosi o lagona o le tosina atu i le itupa e tasi e le o se fuataga o lou faamaoni. E toatele tagata e tatalo mo tausaga e tele ma faia mea uma latou te mafaia e usiusitai ai, ae latou te tosina atu pea i le itupa e tasi. O le tosina atu i le itupa e tasi e eseese vaega o malosiaga e lagonaina ai ma e le tutusa mo tagata uma. O nisi e tosina atu i itupa uma e lua, ae o isi e matua tosina atu lava i le itupa e tasi. Mo nisi, o lagona o le tosina atu i le itupa e tasi, po o le malolosi foi o na lagona, e mafai ona faaitiitia i le aluga o taimi. I soo se tulaga lava, o se taunuuga ina ia suia le tosinaga e le tatau ona faamoemoeina pe poloaiina e matua po o taitai.

O le malosi o lagona o au tosinaga atonu e le mafai ona e puleaina; peitai, e mafai ona e filifili le auala e te tali atu ai. O le ole atu i le Alii po o le a se mea e mafai ona e aoaoina mai lenei aafiaga ma le auala e mafai ona avea ai lenei mea ma se malosiaga ia te oe e mafai ona faataulai atu ai lou faatuatua i se taunuuga e mafai ona e puleaina. O le tuuina atu o lou olaga i le Atua o se faatinoga taua lea o le faatuatua lea e oo mai ai faamanuiaga maoae i le taimi nei ma e oo lava foi i faamanuiaga maoae atu i le lalolagi a sau.

## **Pe O Le A Suia ea e le Ekalesia Lana Aoaoga Faavae ma Faatagaina Faaipoipoga o le Itupa e Tasi?**

E totonugalemu i le fuafuaga a le Atua, o le aoaoga faavae o le faaipoipoga i le va o se alii ma se tamaitai o se aoaoga taua lea o Le Ekalesia a Iesu Keriso o le Au Paia o Aso e Gata Ai ma o le a le suia lava:



“I le avea ai ma se mataupu faaleaoaoga faavae, e faavae mai tusitusiga paia, ua faamautuina ai e le Ekalesia e faapea o le faaiipoipoga i le va o se alii ma se tamaitai e taua i le fuafuaga a le Atua mo le taunuuga faavavau o Ana fanau.

“O faiga feusuaiga ua na o le va lava o se alii ma se tamaitai ua faaiipoipoina faaletulafono o se tane ma se ava e tatau ai. Soo se isi lava la faiga feusuaiga, e aofia ai [feusuaiga] i le va o tagata o le itupa e tasi, o se agasala ma e faavaivaia ai le foafoaga faalelagi o le aiga. O le mea la lea ua faamautu ai e le Ekalesia le faauigaina o le faaiipoipoga o se tuufaatasiga faaletulafono i le va o se alii ma se tamaitai.” (*Tusitaulima 2: Taitaiina o le Ekalesia*, 21.4.10).